

清代筆記叢刊

庸閒齋筆記

陳其元著

三

新加坡華僑教育會

刊

庸閒齋筆記卷七

海昌陳其元子莊著

夢王十朋

上海余見韋文榮言晚年登第夢王十朋以侍生帖來謁時年已老私念豈能鼎甲乎後列三甲除縣令又夢十朋以治生帖來拜不解其故嗣選樂清始悟前夢至縣遂脩其墓訪其子孫又夢十朋來謝未幾獵人以虎皮送云是十朋墓所獲也

開吳淞江

同治十年冬大府奏開吳淞江合崑山新陽寶山嘉定華亭婁縣南匯川沙青浦上海九縣一廳之民以赴役余時攝上海縣事江之濬起于青浦訖于上海共一萬一千餘丈而江之在上境者十之七故上海承派之工居十之四彼八縣一廳僅得工之十六耳上海圖止二百十有四田止六十八萬餘畝而承此大工民力困甚然自同治二年起已如此派法不能不照章辦理于是按圖分段按畝出夫搶攘一月有餘自十年十二月起至十一年正月初旬民夫始陸續赴工興挑遇雨即停止雨止則戽水水盡再挑再雨再戽春日多雨戽水不勝其億且一遇天雨夫即散歸雨止後或來或不來又須催提蓋夫在本境近歸家易不若

他縣長募之夫。距家遠不能歸。可坐守也。他縣分地少。夫常集雨止晴挑勢常逸。故見功易。上海分地多。夫易散。雨止而晴。不能即挑。勢常勞。故見功難。然同事一江。他縣竣工。而上海不能不隨之竣。則追呼不可少緩也。他縣地少。皆併于一局。而呼應靈。且其財粟于一局。而用度便。上海地多。圖自為局。二百十四圖。則二百十四局。意見不能無扞格。即指臂已不能自如。又往往有此圖之資已罄。或歸取。或商借。紛紛擾擾。不能歸一。則約束不可不嚴也。余自正月初即赴工督辦。誘掖獎勸督責。胥焦舌敝。歷一百餘日。居然不悞工。且先他縣完工。工程之寬深如式。甲于他縣。歷荷大府褒嘉。雖由董事之經理得宜。小民之赴工趨事。此其中殆有天幸焉。圖董中有文生張春沂者。年八十六歲。精力如少壯。從事四閱月。急公踴躍。未嘗告勞。且為他圖排解一切。絳縣老人不足多矣。大工既藏。余因上海受工太鉅。民力不勝。歷陳本邑凋敝情形。詳請大府。以後開濬之役。永遠減去二成。已荷批准立案。余去任後。聞圖民已將憲批及余詳文刊石垂永久。庶幾民困少蘇。余亦藉告無罪于吾民耳。先是雍正六年。家文勤相國奉世宗之命。督開吳淞江時。松江府知府周公中鉉勤其官而水死。優旨贈太僕寺卿。遺民感德。私祀之。屢著靈爽。道光七年。巡撫陶文毅公重濬此江。以公陰佑奏奉特旨立廟江干。春秋致祭。方事之殷也。余以公與先相國當日有共事之雅。虔禱公祠。

半年之中。聚民夫數萬人于河上。風塵不驚。疾疫不作。工程克期。是非神助。曷克臻此。故于竣事後。上一聯于神祠曰。百四十年舊蹟重開。念先人誼切同舟。數典敢忘其祖。萬一千丈鉅工告藏。慶此日江流順軌。惟公所存者神。以志神貺云。

開河有鐵沙。有陷沙。又曰濫沙。鐵沙不過費力。開一層即深一層。陷沙則今日挑去若干尺。明日又漲出若干尺。工費最重。法當多集人夫。一日挑竣。放水壓之。乃可不漲。而挑至深處。一日又不能竣工。則須有烈日晒之亦可。此外更無別法。又有爛泥。亦非易挑者。挑過泉眼。水湧濫噴出。一夕可以滿河。法以木桶圍之。而挑其旁。則不致橫溢。而水亦隨旁落。更有龜窟之處。則水不能肩乾。是役也。遇有二窟。一在太僕廟上里許。岸水一日。龜自徙去。岸上見其足蹟。次日遂涸。一在太僕廟下四五里。其窟最大。集人夫數百。岸之一日。僅去水尺許。一夕如故。內中有老龜探首出窺。頸大如甕。復有大紅鯉魚。長八九尺。游泳其中。岸數日。人力窮而工不竟。乃築防環其窟。而于其外施工焉。從來築城築堤。但以土方計工。而開河則必兼水方。如此次濬江。先築壩岸水。水盡乃施挑工。每三十丈置一車。以備岸水。殊不知開挑既深。先則需二車以接。繼則三車相接。終則四車相接。四車不過抵一車之用。而人夫倍蓰矣。況三十丈之長。一車斷不敷用。則不能不添車。此即圖賠矣。初開不過去地一文。二人一

日可得土一方。受值裕如。至一丈五尺。四人竟日僅得土一方。而水已橫溢四出。又別需人運水。其運水需樁需壩。乃得運土。運土定例。又須出土于十丈之外。而運者由下而上。往返計二百三四十步。人益勞。既深至二丈。則四人竟日尚不得土一方。而所定土方之值不能增。總局始事所計。但及土方之工。既束于成數。欲稍為變通。則土未及半。帑銀已竭。不能不聽各圖之自為籌畫。此又圖賠矣。圖安能賠。不過按田貼費而已。故上海素有開河田還債之謠。此等情形。余均瀝陳于應敏齋方伯之前。方伯聞之。亦深愴惻。故減派一詳。得以邀准。計是役民間貼費不下五萬。勤而克集。余所貼僅千金。而百姓顧頌余不置。良足愧也。因詳記之。俾後來有所攷焉。

開河之先。必須兩頭將壩築住。而後可以戽水。築壩前一日。當事者先行祭壩。而後施工。祭過之後。雖河面數十丈之廣。河身數十里之長。戽水之時。一鱗不獲矣。若仍有魚。則壩必坍塌。余在南匯開呂家浜。上海開吳淞江。皆是如是。謂非有神司之可乎。

劫運

咸豐辛酉之冬。諸暨包立生。初與賊拒時。賊屢以萬眾環攻之。立生率村眾出戰。輒得大捷。每一陣。必斬刈千百。賊多束手就戮者。因相傳立生有異術。得仙靈護佑。及壬戌之夏。一敗。

塗地。初無神奇。人多不解其故。因憶家梅亭方伯嘗言嘉慶初年三省教匪作亂之際。方伯時為縣佐。解餉銀數萬。赴大營中途。猝與賊遇。望見前山有一營官軍駐紮。急走依之。未及里許。賊已驀至。乃推餉車入深草中潛匿。已及人夫皆伏於車畔。賊大隊從旁吹脣而過。竟不之睹。以為山前必決鬪矣。乃從草間遙望之。但見賊至營內。官軍並不接仗。皆延頸就戮。賊遂燒營而去。始相慶幸。不走入營盤得免死。然官軍所以不鬪之故。卒不能知。此教匪破敗時。官軍數十人追賊。可以斬殺數百千人。無一人扞格者。乃悟劫運使然。前後皆是氣之所懾。立生之勝敗。亦此類也。

冥王用通事

上海五方雜處。獄訟煩多。訊鞠閩廣人之案。不能不用通事。俾傳達言語。顧一省之中。口音亦復各別。即通事有不能盡解者。每以為苦。嘗戲與友人言。此時滬上華夷雜處。死者魂歸東嶽。恐冥王傾耳於侏儒之音。亦不能辨。必須亦廣用舌人矣。友人謂鬼神者。二氣之良能。既已神矣。安有不解之理。後閱乾隆中上海人李巽廷明府心衡所著金川瑣記。內載丙午春。章谷城隍廟落成。鋪戶中一銀匠某。死半日復甦。自言城隍招募差役十三名。並我得十人矣。尚缺其二。慮無可充通事者。以通漢語夷人為之我舉通事某勤慎可用。城隍已賜允。我生前

無大過惡。幸不被譴責。冥間與陽世無異。戒妻子勿悲泣。言訖長逝。所謂某者。小金川夷人。充章谷屯通事有年矣。強健無恙。翌午。覺心腹猝痛。踰刻即死。金川漢番錯處。非通事不能達語言。顧神無不格。猶需狄鞮耶。固知陰陽一理。事非偶然云云。則余所謂今之冥王不能不廣用古人。非無稽之戲言矣。

華亭令戲懲武秀才

江蘇人尚文學。習武者少。然武科不能廢。當歲試之年。輒搜羅充數。往往不及額而止。無賴者幸博一衿。不求上進。每橫于一鄉。不特閭里苦之。即地方官亦苦之。嘗聞前華亭令雲夢許君治鞫一事。不禁為之失笑。許君為政以廉幹名。一日者有武生扭一鄉人至縣。喧訴許訊其故。則鄉人入城擔糞。誤觸生。汙其衣。已經途人排解。令代為浣濯及服禮。而生不可必欲痛扶之。而後已。許詢悉其情。亦拍案大怒曰。爾小人乃粗心。擅汙秀才衣。法當重責。鄉人惶恐乞憐。許良久曰。姑寬爾。令生坐於堂側。而飭鄉人向之叩頭百以謝罪。叩至七十餘。許忽曰。我幾忘之。爾之秀才。文乎武乎。對曰。是武則又。驟然曰。我大誤。文秀才應叩一百。武則一半可矣。今多叩二十餘頭。爾應還之。復令鄉人高坐。而捉武生還叩。生不肯。則令皁隸挾持。而抑其首。叩還二十餘。乃釋。生大怒走出。許撫掌大笑。邑人觀者聞者。亦無不大笑。也是

舉雖非正道。然松人至今嘖嘖以為美談。詩云。善戲謔兮。不為虐兮。許君之戲。毋乃近于虐哉。

修歸太僕墓

許君乾隆己未進士。需次都門時。夢歸太僕。有光持名刺來謁曰。廬舍遭鄰人削且盡。祈公主持之。寤而不解其故。尋選崑山令。抵任太僕後人適訴祖墓被佔事。恍悟前夢。立往經丈。凡越佔者。悉清還之。並立碑定界焉。同治庚午。余代理新陽縣事。墓又復蕪穢不治。余捐俸修葺。並為建立墓門。會歲試。拔其十世孫祖英第一。補博士弟子員。俾世守太僕墓。然余並無所謂夢兆也。

耕藉大典

耕藉之禮。各直省屆期舉行。江南諸縣。皆以穀播。上海則兼播棉子。以其地產棉也。記余道光壬辰歲在京師。詣先農壇恭觀皇上耕藉之所。壇地遼闊。約有數里。龍鱗鳳隲。隴畝縱橫。居中為太歲廟。廟前為祈穀壇。後為貯藉倉。殿宇規制宏麗。樹皆松柏。卧者立者。虬枝蟠結。黛色參天。大抵是數百年物。當隴畝前起耕藉臺。臺以板為之。地則藉之以稊薦。臺前搭山棚。棚皆以五彩綢綾結成。光燦奪目。皇帝躬耕之處。地約一畝許。兩旁分十二畦。乃三公九

卿扶犁之所。時正值諸王公方演御耕牛。牛色正黃。身披黃緞龍韉。以黃絲繩籠其頭頂。暨金牌。上嵌紅寶石一。執鞭執便桶之農官。隨行耕時。兩旁立校尉。執五色春旂者二十四人。歌禾詞者二十四人。依牛行。上下三推畢。春旂即退。三公九卿之牛。皆以黑緞紅緞為韉。襄事者俱風簑雨笠。以象農事。煌煌鉅典。仰見聖朝重農之盛意矣。

鹵簿名物記

余在京師。嘗值大駕郊祀。又恭遇六飛謁陵。鹵簿之盛。觀之而不識其名。問之亦不能盡悉。頗以為歉。嗣聞吳江陸朗夫中丞。鹵簿名物記。始恍然若置身屬車豹尾間。因節錄之。按鹵簿之別。有曰大駕者。郊祀用之。曰法駕者。朝會用之。曰鸞駕者。歲時出入用之。曰騎駕者。行幸所至用之。大駕最為備物。尊天祖也。法駕稍損其數。文物聲明。取足昭德而止。鸞與騎。又加損焉。事非特典。不敢同於所尊貴也。凡為蓋者五十有四。九龍而曲柄者四。色俱黃。翠華紫芝兩蓋。承之。九龍而直柄者二十。色亦黃。皆以次序立。花卉而分五色者十。九龍而分五色者亦十。每色各二。其立不以次。而以相間。純紫與赤。而方蓋者八。為扇者七十二。壽字者八。黃而雙龍者十六。赤而雙龍者八。黃與赤單龍者各八。孔雀雉尾及鸞鳳文而赤且方者各八。幢之屬十有六。長壽也。紫也。霓也。羽葆也。各四。幡之屬十有六。信幡也。絳引也。豹尾也。

龍首竿也。亦各四。曰教孝表節。曰明刑弼教。曰行慶施惠。曰褒功懷遠。曰振武。曰敷文。曰納言。曰進善。八者各為一偶。凡旌之屬亦十有六。于是有四旌節。四儀。鎗。麾。四黃麾。而繼之以八旂。大纛二十四。羽林大纛。前鋒大纛。共十六。五色銷金龍纛。共四十。凡為纛者八十。旂取諸祥禽者。儀鳳。翔鸞。仙鶴。孔雀。黃鵠。白雉。赤烏。華蟲。振鷺。鳴鳶。取諸靈獸者。遊鱗。彩獅。白澤。角瑞。赤熊。黃熊。辟邪。犀牛。天馬。天鹿。取諸四神者。四。取諸四瀆。五嶽者。九。取諸五星。二十八宿者。三十三。取諸甘雨者。四。取諸八風者。八。取諸五雲。五雷者。十。取諸日月者。各一。其外有門旂八。金鼓旂二。翠華旂二。五色銷金小旂各四。出警入蹕旂各一。旂之數共百有二十。為金鉞為星。為卧瓜。為立瓜。為吾仗。為御仗。各十有六。又六人持仗而前導。曰引仗。自蓋至引仗。其名一十有七。紅鐙六。二鐙之下。鼓二十四。金二。仗鼓四。板四。橫笛十二。又二鐙之下。鼓二十四。金二。仗鼓四。板四。橫笛十二。又二鐙之下。鉦四。大小銅角各十六。自紅鐙至銅角。其名一十有六。午門之內有金輦。玉輦。馬。午門之外有五輅。五寶象。馬。天安門之下。則又有四朝象。馬。朝象雖非朝期。率每晨而一至。引仗以上。在太和門之內。銅角以上。在端門之內。其最近御座者。有拂塵。有金鑪。有香盒。數各二。沐盆。唾盂。大小金餅。金椅。金板。數各一。執大刀者。執弓矢者。執豹尾槍者。每事各三十人。其立亦不以次。而以相間。荷戈戟者。各四人。侍殿

前執曲柄黃蓋者一人。殿下花蓋之間。執淨鞭者四人。自黃龍以下。諸蓋之間。仗馬十。掌騎者千人。殿之下。陛之上。執戲魔音竹者二人。計鹵簿所需千八百人。國朝制作之明備。真超越前古而上矣。

辨何桂珍之冤

軍興十餘載。士大夫以身殉疆場者。指不勝屈。膏塗原野。莫相收恤者有之。斷軀絕脰。事不上聞者有之。若阻撓百端。獨嬰慘禍。生前招苛議。生後被餘責者。則雲南何公桂珍。冤最甚焉。公以甯太道江南。安撫福公留之江北。令之募勇剿賊。無一金之餉。一昔之糧。得二百人。率之而行。集潰兵團勇合三千人。以大破擒賊。招降賊酋。軍聲大振。論者以為必邀上賞矣。乃以逗留不救。廬江被劾。免官。其寔檄救廬江之文。尚未至公手。而城已被陷。大帥將欲卸己之責。遂歸罪于公。公既褫職。大帥又留公駐英山。八月之中。僅支銀三百兩。而士卒三千人居無帳幕。食無糧米。徒以忠義相激。日提飢軍。轉戰賊中。賊來益衆。兵敗莫援。已岌岌不可終日矣。而大帥又密書令其圖翦招降之賊。書復落於賊手。頃刻變作。公遂粉骨碎身於賊。於是復以機事不密。咎公寔則此書亦未抵公也。公歿後。卹典不及。其弟為行狀。尚不敢聲公之冤。仍循彈章為據。吳侍郎廷棟發憤言之。而事稍白。越數年。曾文正公復為公作殉

難碑記乃獲昭雪。然當時雖正人君子亦未嘗不責公也。余謂公事絕與明督師袁襄愍類。袁斬毛文龍。一時無不謂其冤者。即後世亦盛言之。洎乾隆年間。紀文達公閱歷朝檔子。始知文龍曾通款我朝。則文龍在明固萬死不足惜者也。我太宗文皇帝之圍燕京也。襄愍千里赴援。自謂無罪。壯烈帝以逃歸之太監告其引敵脇和。遂執而剛之。當是時衆議沸騰。雖東林諸賢者亦無不欲食其肉也。直至南都建立。北來人傳太宗之密謀。乃知中反間計。於是始有襄愍之謚。而袁公則既死矣。合觀袁何二公之厄。知千古忠臣義士不逢表白。含冤終古者。當不乏其人也。

古人被冤

古人之被冤者。以余所見莫屈於晉之陶士行。而枉於唐之八司馬。陶公匡輔晉室。與郭汾陽不殊。梅陶謂其忠順勤勞。似孔明。良非虛譽。乃本傳中載。或云侃少時。漁雷澤。網得一梭。以挂于壁。有頃雷雨。自化為龍而去。又夢生八翼。飛而上天。見天門九重。已登其八。唯一門不得入。闔者以杖擊之。因墜地。折其左翼。及寤。左腋猶痛。比都督八州。據上流。擁強兵。潛有窺窬之志。每思折翼之祥。自抑而止。云云。史臣因之。遂加悖矣之詆。復引夫子曰。人無求備。以為斯言之幸。嗚呼。此等紀載評論。何異於秦長脚。莫須有。三字獄哉。使陶公而果有包藏。

之心。則何以辭大將軍。何以季年不與朝權。何以未亡之前。欲遜位歸國。舉動光明。若此。乃以意志之曖昧。誣之不能不為之稱屈矣。夫梭化為龍。事容或有。夢生八翼。未必盡誣。然此亦皆尋常之事耳。試問既稱之曰潛。則於何見之。深探之曰志。則於何知之。曰思折翼之祥。或代之思耶。抑陶公自思耶。陶公自思。何人窺見其思。若或人代思。其思何足為據。凡物將起。而人抑之。固衆所共見也。若意念之起。而自抑之。又豈衆所能見耶。此等之志。與思使陶公果有之。必不肯告人明矣。陶公不言。而人能窺之。豈理也耶。總之為此謗者。必庾亮之徒。亮以元舅之尊。披膺下拜。反被嘲誚。則心懷之忿悒。何如。陶公甫亡。即表殺其子。豈非報復之明徵哉。史臣無識。從而采之。橫使忠臣被不忠之謗。豈不令人氣阻。唐王叔文王伾侍順宗於東宮。順宗既即位。甘盤舊學。擢在貴近。亦事之常。叔文與伾贊襄初政。首罷宮市。則卹民也。追陽城陸贄。則進賢也。拒韋臯之請兼兩川。則持大體也。辨劉闢之奸。則有遠識也。至欲奪宦官之兵權。尤是唐朝第一大事。不幸而順宗之疾不瘳。宦寺俱文珍等。遂起而與之為難。太子急欲得帝位。韋臯窺其意而請之。文珍迎其意而立之。于是八司馬敗矣。然求寔叔文伾之罪。無有也。乃加以陰謀秘計等語。是亦莫須有之獄也。鍛鍊周內。無瑕可摘。則以王伾之吳語。亦舉以為惡。夫以伾吳人不許為吳語。豈晉人楚人一仕于朝。即不得為晉楚

語耶官官以此為罪名。史官據此定罪案。豈不可恨。不然八司馬中。陸質之經術。劉禹錫之詞章。柳宗元之文章。政事皆表表一時。憲宗豈真一無所見。特以文珍輩擁立之故。遂低首下心。一切任之。卒之劉闢果反。憲宗亦終弑于闕寺。馴至甘露之變。唐室遂以不振。八司馬雖含冤於九原。當不免竊笑於地下耳。後來賢如范文正公。已稱其枉。至我高宗純皇帝御論。亦辨白之。八司馬者。得後世賢相聖君為之昭雪。當可無遺憾矣。

陳卧子

少時讀明陳卧子先生制藝。心即儀其人。同治戊辰。攝宰青浦縣。縣境所轄之廣富林。則公墓道在焉。粵寇之亂。祠堂被燬。宰木無存。余因捐俸集貲。重建祠宇。而以公同志。夏考功父子配祠。既成。以公為高宗所褒卹。曾賜忠裕特謚者。遂詳請以公墓列入邑之祀典。春秋遣官致祭。總督馬公。巡撫丁公會疏入奏。已巳之春。得旨報可。余因率同官親往致祭焉。考公一生文章。政事風義。炳若日星。殉節後。子婦三世苦節。具見明德之遠。乃卒斬焉。無後。不能不有疑於天道。然公大節大名。昭垂宇內。亦不在子孫之有無也。公初生時。母夫人夢若龍者降室之東壁。蜿蜒有光。故名子龍。後與陸子玄同祈夢于忠肅祠。公夢負一虎。謂必風雲會合之意。子玄則忠肅授以瀋陽地圖一卷。亦意其當官於此地也。嗣公起義殉國。雖赴水

死猶懸其首於虎頭牌上。宛然虎負之象。而子玄以丁酉科場。竟流遼左。事皆奇徵。故余為公詳請崇祀。文內有曰。生有自來。夙著蟠龍之瑞。死而後已。果符負虎之徵。蓋指此二事也。夏考功彝仲謚忠節。曾舉天下清官第一。子舍人完淳字存古。謚節愍。年十六遭國難。作大哀賦。論者謂不減庾信之哀江南。先後與公抗節死。公豹目蜷髮。又目上視為盼刀眼。與于忠肅同居。恆攬鏡曰。此頭終當為誰斫。于順治丁酉筮得明夷。五月遂遇難。明史于公傳書華亭人。而崇正三年南國賢書所列解元楊廷樞吳縣人。而公則署青浦縣學生。青浦于嘉靖時割華亭上海縣地所置。史特仍其舊貫而書之耳。楊廷樞字維斗。亦殉國難。

華亭縣分析攷

華亭古囂縣地。屬會稽郡。後改婁縣。屬吳郡。至唐始析崑山海鹽嘉興三縣地置華亭縣。而吳郡改蘇州。後唐同光年分蘇州置秀州。宋政和年又改為嘉禾郡。慶元年升為嘉興府。而華亭縣仍屬焉。元至元年分嘉興路置華亭府。復更名松江府。又析華亭縣為上海縣。明再析華亭上海縣地置青浦縣。本朝雍正二年復析華亭上海縣地置南匯縣。余五六年中。歷攝南匯青浦上海三縣事。寔則尚不出古之華亭一縣地也。嘉興府即古由拳城。後城陷為湖。今青浦縣之澱山湖是明萬厯朝築青浦縣。其磚石皆撈于湖內之故城。由拳之陷而為湖。

疑不在秦時。特載籍無可攷證。余宰青浦時。曾作峰泖蕙思圖。秀水金蓮生鴻佳為題四絕句。內一首云。青龍鎮屬由拳地。難得雙鳬集此間。若以宦途今視昔。花封依舊在鄉關。亦指由拳故城而言。青龍鎮吳孫權造戰船處。今隸青浦。

作官須明公罪私罪

合肥蒯蔗農觀察德標。真誠篤寔。古君子也。督辦松滬釐捐總局。余于丙寅冬。奉李爵相委。提調局務。日夕共事。最為契合。觀察言。爵相家居時。門前有一大池。冬日涸水。取魚于池底。起得四五寸土。偶萬計人馬戈甲。雕鏤精絕。儼然如生。哄傳遠近。觀者日千百人。不知何祥。既爵相登第。入詞館。有以應之矣。今乃知為弟兄總統師干。削平羣盜之兆。然水中之土。何以能結成人物。豈亦化工為之耶。觀察嘗為余言。作官者私罪不可有。公罪不可無。蓋求免公罪。即是私罪矣。余在青浦。一夜城內有來報盜者。余亟率壯勇往捕。則盜已遁矣。細察情形。盜先以軟梯越牆入。撬門行竊。事主驚起大呼。盜乃以刀嚇刺。而開大門亡去。故房門有撬損痕。而大門無恙。惟所失止洋銀一元錢五百文布衣數件。計贓不逾貲。事主之兄則現充縣役者也。次日具補呈詞。又稱是竊。余曰。已經勘明。臨時行強。何故不言盜。乃囁嚅曰。贓數無多。不敢累本官得處分。余大笑曰。一行作吏。已置升沈于度外矣。爾不知失盜其責輕。